



Mala Høy Kúko, Siumut
Inatsisartunut ilaasortaq

Tasiilami inuussutissanik pilersuineq pillugu § 37 naapertorlugu apeqquteqaammut 2024-76-imut akissut

22-05-2024
Suliap nr.:2024 - 9064
ID. nr. 92326719

Asasara Mala Høy Kúko

Inatsisartut suleriaasianni § 37 naapertorlugu Tasiilami inuussutissanik pilersuineq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

1. Tasiilap inuussutissanik pilersorneqarneranut tunngatillugu Nunatsinniit pilersuisoqalernissaa Naalakkersuisut pilersaarutigaluguluunniit eqqarsaatersuutigaat?

Akissut:

Tasiilami inuussutissanik pilersuinerup pitsanngorsarneqarnissaa Naalakkersuisut pingaartippaat. Taamaattumik Tasiilami containerinik assartuussinissamut pisinnaasat annertusitinnissaannut periarfissat pillugit Naalakkersuisut Royal Arctic Line oqaloqatigaat.

Sullitat Tasiilamut inuussutissanik containerini assartuussisassanersut, Naalakkersuisut imaluunniit Royal Arctic Linep aalajangersinnaanngilaat. Taamaattoq Naalakkersuisut aamma Royal Arctic Linep umiarsuit umiarsualivimmut tikittarnerisa akulikissusaa allanngortissinnaavaat.

Pitsanngorsaataasussat, 2023-mi Naalakkersuisunit akuerineqartut, 2024-mut angalanissamut pilersaarummi ilanngunneqarput. Royal Arctic Line tassunga atatillugu paasissutissiivoq:

"Tasiilap nunaqarfiisalu angallavigineqartarnerisa akulikissusaaanut tunngatillugu, taanna ukiumi imaatigut angallaviusussami Nanoq Arctica-p angalatilerneratigut annertuumik pitsanngoriartinneqarpoq. Nanoq Arctica siullermeertumik 2020-mi angalatinneqalerpoq aammalu 2021-miit Reykjavik-imiit ullut 14-ikkaarlugit angalatinneqarluni.

Tamatuma kingunerisaanik DK-miit aamma Islandimiit ullut 14-ikkaarlugit Tasiilap pilersorneqalerluni angallavigineqartalerpoq aammalu nunaqarfiit taamatutaaq Nunatta kitaani nunaqarfiit assigalugit ukiumi imaatigut angallaviusussami ullut 14-ikkaarlugit angallavigineqarlutik.

Ukioq manna Nanoq Arcticap Reykjavik-imiit aallartarnera ullumik ataatsimik marlunngornermut siuartipparput, taamaalilluni umiarsuaq sisamangornerup ingerlanerani tikittarluni (silap tamanna pisinnaatippagu) taamaalillunilu illoqarfimmi usinik tiguisusannut sapaatip akunnerata naalernerani sullissinissaq pinngitsoorneqarluni."

Najukkami pissutsinut pisariaqartinneqartunullu naapertuuttumik allanngortitsinerit pinissaat qulakkeerniarlugu, usinik assartuussinerup naleqqussarneqarnissaa pillugu Naalakkersuisut Tasiilami inuussutissarsionermut siunnersuisooqatigiit oqaloqatigaat. Ukiuunerani annertunerusumik usinik assartuussisarnissaq sulii kissaatigineqartoq, ajoraluartumillu Danmarkstrædet-mi silamik pissuteqartumik umiarsuarmik naammassineqarsinnaanngitsoq, Naalakkersuisut eqqumaffigaat.

Air Greenland 2024-25-mi ukiuunerani sapaatip akunneranut pingasoriarluni timmisartuussisarnissamik pilersaaruteqartoq, Naalakkersuisut ilisimatitsissutigisinnaavaat, tamannalu assartuussinerumt periarfissanik pitsanngorsaataassasoq naatsorsuutigineqarpoq.

2. Tasiilap eqqaani nunaqarfiit inuussutissanik pilersorneqarnerat pitsaanerulersissallugu Naalakkersuisut pilersaarutigaluguluunniit eqqarsaatersuutigaat?

Akissut:

Nunaqarfinnut usinik assartuussineq qanoq pitsanngorsarneqarsinnaanersoq Naalakkersuisut sivisuumik sulissutigaat.

2024-2025-mi ukiuunerani naatsorsuutigineqarpoq, apeqqummut 1-imut akissummi matuma siulianiittumi nassuiarneqartutut, innuttaasut suliiassaqaarfimmi pitsanngoriartoqarnera misigilissagaat.

Angallassinermut periarfissat annertunerulerneranni, Tasiilap eqqaani nunaqarfiit inuussutissanik pilersorneqarnerat pitsaanerulissasoq, Naalakkersuisut neriuutigaat.

Neriuutigaara matuma siulianiittuni apeqqutitit akineqartut.

Inussiarnersumik inuulluaqqusillunga



Erik Jensen